



# Fidelitat a la lenga vernaculara e escritura literària : l'emplec de p(l)us e mai per la gradacion dels adjectius e la quantificacion dels substantius a cò de quelques autors roergasses... emai maites

Jean Sibille

## ► To cite this version:

Jean Sibille. Fidelitat a la lenga vernaculara e escritura literària : l'emplec de p(l)us e mai per la gradacion dels adjectius e la quantificacion dels substantius a cò de quelques autors roergasses... emai maites. Jean-François Courouau et David Fabié. Fidelitats e dissidéncias. Actes del XIIIn Congrès de l'Associacion internacionala d'estudis occitans. Actes du XIIe Congrès de l'Association internationales d'études occitanes. Albi 10-15/07/2017., Section française de l'Association Internationale D'Etudes Occitanes (SFAIEO), pp.285-297, 2020. hal-02123518

HAL Id: hal-02123518

<https://hal.science/hal-02123518v1>

Submitted on 5 Feb 2021

**HAL** is a multi-disciplinary open access archive for the deposit and dissemination of scientific research documents, whether they are published or not. The documents may come from teaching and research institutions in France or abroad, or from public or private research centers.

L'archive ouverte pluridisciplinaire **HAL**, est destinée au dépôt et à la diffusion de documents scientifiques de niveau recherche, publiés ou non, émanant des établissements d'enseignement et de recherche français ou étrangers, des laboratoires publics ou privés.

**ACTES**  
DU  
DEL **XII<sup>e/n</sup>** CONGRÈS

de l'Associacion Internacionala d'Estudis Occitans

de l'Association Internationale d'Études Occitanes

ALBI, 10-15/07 2017

édités par Jean-François Courouau

en collaboration avec David Fabié

editats per Joan-Francés Courouau

en collaboracion amb Dàvid Fabié

# Fid elitats élites et dissidéncias dências dissidéncias dences

Section française de l'Association internationale d'études occitanes

**SFAIEO**

Vol. 1



**Fidelitat a la lenga vernaculara e escritura literària :  
 l'emplec de *p(l)us* e *mai* per la gradacion dels adjectius e la quantificacion  
 dels substantius a cò de qualques autors roergasses... emai maites**

### 1. Introducció

En occitan medieval, *p(l)us* (< PLUS) e *mai(s)* (< MAGIS) se pòdon emplegar tant per la gradacion dels adjectius o dels advèrbis (superlatiu relatiu e comparatiu de superioritat) coma per la quantificacion dels substantius (*mai/plus de -*), aquò se pòt veire dins los exemples que seguissón :

- (1) *Adoncs foron plus autz sos raubimens, e major e soven, e plus fervens e plus continua [fon] en sa oracion.* » (Vida de Sta Docelina).
- (2) ... *so es qu'om no escriva mas las letras solamen qu'om pronuncia per qu'om pueca legir plus certamen e mays claramen.* (Leys d'amor).
- (3) ... *e l donaria pus de terra que anc no ac.* (Roman de N D de Lagrassa)
- (4) ... *Item, an adsordenat que lo dich augment de la sal dure tant solament dos ans e non plus* (Libre Potentia).
- (5) *N'ay mays de dol e de consir.* » (Vida de Sant Honorat).

Ça que la, per la gradacion dels adjectius e advèrbis, *p(l)us* es largament predominant e *mai(s)* pro rar o totalament absent dins fòrça tèxtes. Un comptatge sus un escapolon de uèch tèxtes dels sègles XIII a XV, fa aparéisser los resultats següents :

Tablèu 1

TÈXTE	NOMBRE D'OCCURRÉNCIAS			
	<i>p(l)us +</i> Adj/Adv	<i>mai +</i> Adj/Adv	<i>p(l)us (de) +</i> Substantiu	<i>mais (de) +</i> Substantiu
Donatz + Rasos de trobar	11	0	1	4
Vida de Sta Docelina	49	0	3	10
Las Leys d'amors	40	21	0	20
Vida de St. Honorat	64	0	19	12
Roman de ND de Lagrassa	40	0	13	14
4 Evangèlis (N T de Lion)	41	0	8	0
Libre Potentia	104	2	17	9
Vidas dels troubadors	60	1	11	3
<b>SOMA</b>	<b>409</b>	<b>24</b>	<b>72</b>	<b>72</b>

Un sol tèxte de l'escapolon, *Las Leys d'amors*, fa aparéisser un percentatge significatiu de *mais + Adj/Adv* alara que per la quantificacion dels substantius *p(l)us* e *mais* se repartisson dins de proporcions egals.

Al rebors, dins l'usatge dels neolocutors de l'occitan, e tanben dins l'usatge literari pus contemporanèu, se pòt observar que, per l'equivalent del francès *plus + Adj/Adv*, s'emplega subretot *mai*; *p(l)us* sembla gaireben fòrabandit. I cal segurament veire un reflèx de distanciaciò maximala respièch al francès. Lo fenomèn es coneugut e plan caracteristic dels usatges renaissentistas en contexte diglossic. Per quant a las gramaticas normativas, balhan *p(l)us* e *mai* coma equivalent (Alibert, Salvat), de còps en marcant una preferéncia per *mai* (Vernet).

Per quant a l'usatge de *p(l)us* per la quantificacion dels substantius, sembla pas atestat en occitan modern, que siá dins la lenga vernaculara o dins los usatges literaris.

Sus la mapa 1282 de l'ALF *Plus tard*, se pòt veire que, en defòra de Gasconha, la resposta *p(l)us tard* foguèt obtenguda d'un biais gaireben sistematic. Lo limit entre *pus tard* (*o plus tard*) e *mai tard* (*o mès tard*, *mei tard*) travèrsa los departaments de Gironda, Òlt e Garona, Tarn e Garona, Garona Nauta e Arièja. A l'oèst d'aquela rara avèm lo tipe *mai* + Adj/Adv, a l'est e al nòrd, lo tipe *p(l)us* + Adj/Adv (veire mapa en apendici). Al dintre de l'airal *mai tard* se tròban tres punts dins los Pirenèus-Atlantics, ont avèm *plus* : 686 Lembeia<sup>1</sup>, 692 Auloron-Senta Maria, 694 Nai (dels quals dos, 686 e 694, ont las doas formas son donadas), e al dintre de l'airal *p(l)us tard*, un punt isolat en Droma ont avèm *mai tard* (836 Marsana<sup>2</sup>)<sup>3</sup>. Ça que la, cal pas sobre-interpretar aquela mapa e ne tirar de conclusions precipitadas. La resposta *p(l)us tard* mòstra que *p(l)us* es probablament largament predominant, mas aquò vòl pas dire que *mai* siá impossible. I a benlèu tanben, un efièch de calc, que los questionaris de l'ALF èran administrats en francés.

Dins aquel article, descriurem l'emplec de *p(l)us* e *mai* dins un parlar carcinòl a partir de donadas autenticas. Examinarem puèi en detalh l'usatge de *pus* e *mai* dins d'òbras de cinc autors roergasses originaris dels environs de Vilafranca de Roergue. Lo còrpus se compausa de *Dal brèç a la tomba* e los *Contes de la tatà Manon* de Justin Besson (1845-1918, nascut a Sant Salvador), de *Taritatós* d'Auguste Benazet (1868-1953, nascut a Vilafranca), de *E la barta floriguèt* d'Enric Molin (1896-1981, nascut a Compolibat), de tretze òbras (veire bibliografia) de Joan Bodon (1920-1975, nascut a Crespin) e de *Los crocants de Roergue* e *Memòris* de Ferran Delèris (1923-2009, nascut a Vòs e Bar).

Alargarem enfin l'estudi a un còrpus d'unes setanta escrivans occitans representatius de l'ensemble del domeni linguistic e de la cronologia dempuèi la fin del siècle XVI, per tal de veire s'es possible de ne tirar de conclusions generalas.

## 2. Emplec de *pus* e *mai* dins lo parlar de Senalhac-Lausés (Òlt) per la gradacion des adjectius e la quantificacion dels substantius

Dins lo parlar de Senalhac-Lauzès (Òlt), descrich dins Sibille 2015, los parlaires emplegan exclusivament *pus* – que dins aquel parlar se destria per la forma de la negacion (*(pas) plus*<sup>4</sup> – per la gradacion dels adjectius e dels advèrbis quand l'advèrbi de gradacion precedis immediatament l'adjectiu o l'advèrbi, e exclusivament *mai* per la quantificacion dels substantius<sup>5</sup> : *Es pus bèl que son*

<sup>1</sup> Fòrma oficiala : *Lembeye*.

<sup>2</sup> Fòrma oficiala : *Marsanne*.

<sup>3</sup> Cal apondre que pel tipe *mai tard*, la realization [maj] se tròba pas que sus dos punts : 637 Santa Liurada (Òlt e Garona) e 836 Marsana (Droma), endacòm mai trobam las formas gasconas *mès* [mes] o *mei* [mej] ≈ [me].

<sup>4</sup> Aquela situacion d'especializacion de la forma brèva *pus* per la gradacion dels adjectius e dels advèrbis e de la forma plena *plus* per la negacion (*(pas) plus*, es pas excepcionala dins los parlars occitans : sus las mapas 900 (*elle n'est plus*) e 1154 (*nous ne le revîmes plus*) de l'ALF, los punts ont trobam (*(pas) plus* [ply(s)]), sens ésser majoritaris, son pro nombroses, se'n tròba en particular dins Òlt, Cantal, Tarn e Garona, Òlt e Garona, Avairon, mas tanben dins tot l'est occitan, en tot 77 punts (sus la basa de la mapa 900). Alara que per *plus* + Adj/Adv (mapa 1282 *plus tard*) se'n tròba pas que 23 : tres dins los Pirenèus Atlantics (692, 693, 694), un en Gironda (643), un dins Òlt e Garona (636), un dins Leire (816), un dins Leire Naut, cinc dins Ardecha (824, 825, 826, 827, 833), quatre dins Droma (837, 847, 855, 857), un dins Isèra (849), dos dins los Alps Nauts (866, 971), tres dins los Alps Marins (888, 991, 998), un dins la província de Turin (972), e pas cap dins Òlt e Avairon, nimai dins los departaments limitrofs, a despart del punt 636 Seichas (forma oficiala : Seyches) dins Òlt e Garona.

<sup>5</sup> Dins la part transcrita del còrpus oral que serviguèt de basa a aquel estudi (apr'aquí 38 000 mots), trobam 60 ocurréncias de *pus* + Adj/Adv e pas cap d'ocurréncia de *mai* + Adj/Adv. Invèrsament, trobam 16 ocurréncias de *mai* + Substantiu e pas cap d'ocurréncia de *pus* + Substantiu.

*fraise* ; *Arribarà pus tard* ; *Vòli mai de vin* ; *Augan avèm ajudas mai de noses qu'antan*<sup>6</sup>. Ça que la, *pus* fonciona coma una mena de clitic e d'aquí es somés a d'unas restriccions dins de contexes particulars, al contrari de *mai* que pòt receber un accent fort :

– *Pus* se pòt pas destacar de l'adjectiu o de l'advèrbi regit, en particular en cas d'ellipsi o de tematizacion de l'adjectiu o de l'advèrbi, dins aquel cas s'emplega *mai* : *Es pus aimable que son fraire* mas : *Aimable, z'es mai que son fraire* e non pas *\*Aimable, z'es pus que son fraire*. La mapa 1041 de l'ALF (*je suis malade*) plus que *toi* fa veire qu'aquela restriccion es generala en occitan, a l'excepcion de tres punts situats a l'extrèma periferia del domeni : 504 *Dun le Palestel* (Creusa), 849 *Lo Monestèri de Clarmont* (Isèra) e 982 *Maiseta* (província de Turin) ont avèm *pi* qu'es un piemontesisme.

– S'emplega exclusivament *mai* o *mens* e jamai *pus* o *mens* : *Lo francés, lo parlavem mai o mens bièn* e non pas *\*Lo francés, lo parlavem pus o mens bièn*.

– Per l'equivalent del francés *de plus en plus* + Adj/Adv, los parlaires emplegan gaireben totjorn de *mai en mai*, ça que la *de pus en pus* sembla possible (es l'intuicion dels parlaires qu'avèm interrogat sus aquel punt, mas n'avèm pas cap d'exemple dins lo còrpus e cresém pas d'o aver jamai ausit) : *es de mai en mai aimable* puslèu que *es de pus en pus aimable*.

– quand l'advèrbi de gradacion es modificat per un autre advèrbi, los parlaires emplegan majoritàriament *mai*, mas *pus* demòra possible : *es plan mai aimable que son fraire* o *es plan pus aimable que son fraire*.

D'après lo testimoniatge d'un locutor natiu qu'avèm consultat, lo meteis sistèma se retròba dins los parlars dels environs de Vilafranca de Roergue tant per la gradacion dels adjectius e advèrbis coma per la quantificacion dels substantius.

### 3. Emplec de *pus* e *mai* a cò de Besson, Benazet, Molin, Bodon, Delèris

#### 3.1. Gradacion dels adjectius e dels advèrbis

Avèm comptabilizat dins lo còrpus l'ensemble de las ocurréncias d'emplec de *pus* o *mai* per la gradacion dels adjectius o dels advèrbis, e per la quantificacion dels substantius. Per *pus* o *mai* + Adj/Adv, avèm comptabilizat a despart los cases generals (*pus* o *mai* non modificats seguits immediatament d'un adjectiu o d'un advèrbi) e los contexes particulars segunts :

- 1) Adjectiu o advèrbi destacat de *pus* o *mai*.
- 2) *Pus* o *mai* modificat per un autre advèrbi.
- 3) *Pus* o *mai* + Adj/Adv dins de contexes negatius de tipe *es pas pus/mai aimable que son fraire* ont avèm un comparatiu de superioritat qu'es negat<sup>7</sup>.

Avèm pas trobadas cap d'ocurréncias de *pus de* + Substantiu.

Per la gradacion dels adjectius e dels advèrbis, avèm obtenguts los resultats segunts :

<sup>6</sup> *Mai* se pòt tanben acordar amb lo substantiu, amb o sens la preposicion *de* : *Avèm ajudas maitas noses qu'antan* o *Avèm ajudas maitas de noses qu'antan*. Ça que la, *maites/maitas* acordats al plural, an pus sovent lo sens de *d'autres/d'autras*.

<sup>7</sup> Consideram que, dins aquel tipe de contexe, la question de saber se la negacion pòrta sul verb o sus l'advèrbi de gradacion es un afar de quadre teoric e d'interpretacion a la quala es pas possible d'aportar una responsa categorica.

Tableau 2

autor	nombre de mots	NOMBRE D'OCCURRÉNCIAS							
		<i>pus</i>	<i>mai</i>	<i>pus</i>	<i>mai</i>	<i>pus</i>	<i>mai</i>	<i>pas pus</i>	<i>pas mai</i>
Besson	55 385	203	0	0	2	9	3	7	0
Benazet	27 089	29	1	0	0	0	0	4	0
Molin <sup>8</sup>	86 385	212	2	0	2	2	0	2	0
Bodon	375 246	581	3	0	7	25	0	2	0
Delèris	185 197	252	1	0	7	4	5	4	0
<b>SOMA</b>	<b>719 302</b>	<b>1277</b>	<b>7</b>	<b>0</b>	<b>18</b>	<b>40</b>	<b>8</b>	<b>17</b>	<b>0</b>
		0,5 %		100 %		17 %		0 %	

En defora dels contexes particulars trobam pas que sèt frasas sus 1284, que *mai* i es utilitzat per la gradacion d'un adjectiu o d'un advèrb :

(6) *Lous drolles, quand n'i a, sou mai mirgassats<sup>9</sup> que de cats isabèls* (Benazet).

(7) *Es mai qualificat que vautres* (Molin).

(8) *Cossí que siguès, jamai l'ainat del rei foguèt pas mai carit.* (Molin)

(9) *Pr'aquò l'aiga destillada es mai pura que l'aiga primièira...* (Bodon)

(10) *Las parets se fasián pus negras e las gents mai aissas...* (Bodon)

(11) *... e tanben quelques arpadas del seu discípol mai renomenat.* (Bodon)

(12) *Cossí escriure ? Al mai prèp de mon parlar ?* (Delèris)

La frasa (8) a pas d'èsser classada dins lo cas particular n° 3, d'abòrd que dins aquela frasa lo comparatiu *mai carit* es pas negat. D'efièch, *pas* es en correlacion amb *jamai* dins l'encastre d'un sistèma de concordància negativa. La frasa se pòt tornar formular : ... *l'ainat del rei foguèt pas jamai mai carit.* (fr. *jamais l'ainé du roi ne fut davantage chéri*). Aquí, l'emplec de *mai* permet de levar una ambigüitat que *l'ainat del rei foguèt pas jamai pus carit*, dins lo parlar de Molin, se poiriá interpretar coma fr. *jamais plus l'ainé du roi ne fut chéri*<sup>10</sup>.

Dins la frasa (10), l'alternància de *pus* e *mai* constituis un efièch d'estil que ja avèm rescontrat en occitan medieval dins la frasa (2). Per las autres cinc frasas, se vei pas de rason particulara que justifique l'emplec de *mai* puslèu que *pus*.

Quand l'adjectiu es destacat de l'advèrb de gradacion, es totjorn *mai* qu'es emplegat, aquò confirma la règla qu'avèm observada a Senalhac-Lausés. Aquí-ne quelques exemples :

*Cap de dama de París, de Bordèu ni de Tolosa, mai que ieu es pas urosa...* (Besson)

*E dison qu'es tan bèl o mai que l'Anglatèrra...* (Besson)

*Sens èstre esmogut mai qu'aital* (Molin)

*Èri devociós, benlèu mai que totes los autres.* (Bodon)

*Las muòlas se mostreron recipias, mas pas mai que çò crentat per Raols.* (Delèris)

<sup>8</sup> Contràriament als autres quatre autors aquí estudiats, Molin escriu *plus*, e non pas *pus*, davant un adjectiu o un advèrb, mas es una causida grafica que correspond pas a la prononciacion de son parlar.

<sup>9</sup> *Mirgassat* es – çò sembla – un apax.

<sup>10</sup> Per la negacion a dimension temporala (fr. *ne...plus*), Molin emplega exclusivament *plus* o *pas plus* (la concordància negativa es facultativa).

Quand l'advèrbi de gradacion es modificant per un autre advèrbi, l'emplec de *mai* es un pauc pus frequent que dins lo cas general, pr'aquò *pus* demòra largament majoritari :

*Tan Grand que siguetz, sètz tant mai pietadós.* (Besson)

*La memina, que se fasiá un pauc plus vièlha cada jorn.* (Molin)

*Sètz plan pus jove que ieu.* (Bodon)

*La medina, pus pichona que la de Casablanca, èra un pauc mai avenenta.* (Delèris)

Dins lo cas de negacion del comparatiu, sus 17 ocurréncias avèm pas relevada cap d'ocurréncia de *mai*. Podèm donc supausar qu'aquel contèxte a pas d'influéncia sus la freqüència d'emplec de *mai*, e que lo cal assimilar al cas general.

Avèm tanben comptabilizadas las ocurréncias de las locucions *pus o mens/mai o mens* e *de pus en pus/de mai en mai + Adj/Adv* :

Tableu 3

AUTOR	NOMBRE D'OCURRÉNCIAS			
	<i>pus o mens + Adj/Adv</i>	<i>mai o mens + Adj/Adv</i>	<i>de pus en pus + Adj/Adv</i>	<i>de mai en mai + Adj/Adv</i>
Molin	0	0	0	0
Bodon	0	1	0	2
Delèris	0	6	3	4
Besson	0	0	0	0
Benazet	0	0	0	6
<b>SOMA</b>	<b>0</b>	<b>7</b>	<b>3</b>	<b>12</b>

Aqueles resultats, emai i aja paques ocurréncias, coïncidisson amb las observacions qu'avèm fachas pel parlar de Senalhac-Lauzès : \**pus o mens* s'emplega pas, *de mai en mai* es preferit a *de pus en pus*.

### 3.2. Quantificacion dels substantius

Per la quantificacion dels substantius, los autors estudiats emplegan exclusivament *mai* : Besson, 42 ocurréncias ; Benazet, 16 ; Molin, 48 ; Bodon, 143 ; Delèris, 75.

### 3.3. Sintesi

En defòra de cases particulars, los cinc autors estudiats fan servir *pus* per la gradacion dels adjectius, l'utilizacion de *mai* es rarissima.

D'unes contèxtes particulars enebisson l'emplec de *pus* :

- quand l'advèrbi de gradacion es destacat de l'adjetiu
- dins la locucion *mai o mens* vs. \**pus o mens*

D'autres contèxtes particulars favorizan l'emplec de *mai* :

- quand l'advèrbi de gradacion es modificant per un autre advèrbi
- dins las locucions *de mai en mai* (pus frequenta) o *de pus en pus* (mens frequenta)

Per la quantificacion dels substantius, sol *mai* se pòt emplegar, *pus* es impossible. Aquò sembla general en occitan moderne, qual que siá lo dialècte, mas èra corrent en occitan medieval.

## 4. Alargament del camp de l'estudi

### 4.1. Comparason amb A. Forés, I. Roqueta e R. Martí

Avèm, dins un primièr temps, comparat los resultats obtenguts amb lo còrpus dels cinc autors roergasses – qu'èran nascuts dins de familhas paisanas e qu'èran d'autentics locutors natius – amb

los resultats obtenguts amb d'òbras disponibles dins la baba BaTelÒc<sup>11</sup>, de tres autors qu'avián un perfil diferent tant del punt de vista generacional e sociologic, que del punt de vista de lor origina geografica :

- August Forés, 1848-1891, nascut a Castelnòu d'Arri (Aude) : *La croès de l'inoundaciu, Les grilhs, Les cants del soulelh, La Muso Silvestro, La Sègo.*
- Ives Roqueta, 1936-2015, nascut a Seta amb d'originas familialas dins lo Sud-Avairon : *Las trèvas d'Orador*, traduccion en occitan de *Les fantômes d'Oradour* d'Alain Lercher.
- Robèrt Martí, nascut en 1944 a Albi amb d'originas familialas dins Avairon : *Lo balestrièr de Miramont.*

Lo tablèu que seguís mòstra de resultats pro diferents d'aqueles de nòstre còrpus roergàs :

Tableu 4

autor	nombre de mots	NOMBRE D'OCCURRÉNCIAS							
		<i>pus</i>	<i>mai</i>	<i>pus</i>	<i>mai</i>	<i>pus</i>	<i>mai</i>	<i>pas pus</i>	<i>pas mai</i>
		+ Adj/Adv	+ Adj/Adv	destacat	modificats	+ Adj/Adv	+ Adj/Adv	+ Adj/Adv	+ Adj/Adv
Forés	84 800	50	41 (45%)	0	4	2	1	0	0
I. Roqueta	18 700	29	12 (29%)	0	0	1	0	0	1
Martí	30 900	19	34 (64%)	0	2	0	7	0	1

Per August Forés, aquela diferéncia se pòt pas explicar que per la variacion diatopica : dins son parlar, l'usatge de *mai* + *Adj/Adv* es probablament pus frequent que dins los parlars de l'oèst de Roergue. Per Ives Roqueta e Robèrt Martí, la question se paua de saber se la diferéncia se pòt explicar per l'influéncia dels usatges literaris contemporanèus que favorizan l'emplec de *mai* o pel fach que la lenga qu'escrivon s'apièja sus una varietat vernaculara diferente de la dels autors de l'oèst de Roergue. Las doas explicacions son pas incompatibles e los dos factors an pogut jogar.

#### 4.2. Extension del còrpus

Per tal d'alargar *mai* lo camp de l'estudi e d'aver una vista d'ensemble de l'emplec de *pus* e *mai* sus l'ensemble del domeni occitan, avèm fargat un còrpus electronic compausat d'obras o d'extraches d'òbras de prèp de setanta autors occitans<sup>12</sup> originaris de differentas regions e qu'an viscut del segle XVI al segle XX, totes nascuts abans la Segonda Guèrra mondiala, a l'excepcion de Robert Martí, nascut en 1944. Lo còrpus es constituit de tèxtes presents dins la baba BaTelÒc e, dins sa pus granda partida, de tèxtes telecargats dins differentas basas textualas (Gallica, Occitanica, CIEL d'Oc, archives.org...) qu'avèm indexats en foncion dels besonhs de l'estudi.

Avèm comptabilizat las ocurréncias de *pus* e *mai* per la gradacion dels adjectius e advèrbis, e per la quantificacion dels substantius dins cada tèxte del còrpus, pel cas general unicament, dins un primièr temps (los contèxtes particulars e las locucions *mai o mens* e *de mai en mai/de pus en pus*, faran l'objècte d'estudis avenidors).


#### 4.3. Emplec de *p(l)us* e *mai* per la gradacion dels adjectius e dels advèrbis

Los resultats, que presentam dins los tablèus en apendici del present article, son estats puèi cartografiats per lesca, sus una escala de sièis, en foncion del percentatge d'ocurréncias de *mai* + *Adj/Adv* : egal a 0 % ; superior a 0 % e inferior o egal a 5 % ; superior a 5 % e inferior o egal a

<sup>11</sup> <http://redac.univ-tlse2.fr/bateloc/>

<sup>12</sup> Precisament : 66 òbras o extraches d'òbras d'autors individuals e tres recuèlhs d'òbras divèrsas, que son senhalats per (\*) dins los tablèus en apendici.

15 % ; superior a 15 % e inferior a 50 % ; egal o superior a 50 % e inferior a 100 % ; egal a 100 %.



**Legenda :** n = percentatge de *mai* per la gradacion dels adjectius e dels advèrbis, fóra contèxtes particulars.

- n = 0
- 0 < n ≤ 5
- 5 < n ≤ 15
- 15 < n < 50
- 50 ≤ n < 100
- n = 100

Los simbòls que remandan a un autor anterior al sègle XIX son enrodats d'un cercle.

(Per comoditat, avèm daissats los noms dels autors jos lor forma francesa oficiala ; aital meteis dins los tablèus en apèndici)

Se vei que los resultats son pas escampilhats a l'azard mas que se repartisson sul territori occitan en airals relativament omogenèus. En Roergue occidental, Cevenas, Provença interiora e maritima, airal vivaroalpenc, los tausses d'emplec de *mai* son nuls o inferiors a 5 % alara qu'en Provença rodanenca e en lengadocien meridional los percentatges son compreses entre 15 % e 50 %, a l'excepcion d'Arièja ont trobam 100 % de *pus* dins las òbras de Loís Pujol. En Peiregòrd e al sud de Coresa, trobam de percentatges compreses entre 5 e 15 %. I a pas qu'en gascon qu'apareis un usatge exclusiu o quasi exclusiu de *mai*. Per Lemosin e Auvèrnhe, lo còrpus es pas, per l'ora d'ara, pro bèl per poder far de generalizacions<sup>13</sup>.

Remarcam tanben qu'en defòra de Gasconha, a cò dels onze autors anteriors al sègle XIX, lo percentatge de *mai* (o *mes*, *mès*) es totjorn nul o inferior a 5 %, o pauc se'n manca amb Francés de Corteta que i trobam 6 %.

<sup>13</sup> I cal pas veire cap de voluntat de negligir lo lemosin e l'avèrnhe. Aquò s'explica pel fach que los tèxtes en nòrd-occitan en format electronic o en format pdf convertible son mens nombroses e pas de bon trobar sus la tela.

Amb 96 % de *mai*, lo cas Max Roqueta representa una anomalia, ne podèm concluir que sa practica es pas lo rebat de l'usatge vernacular mas resulta d'una causida estilistica que s'apareta a una ipercorrecccion e resulta d'una voluntat de se desmarcar del francés.

En domeni vivaroalpenc, David Meyer amb 6 % de *mai* sembla isolat, que los autres autors d'aquel airal emplegan jamai *mai*. Meyer escriu en parlar del Champsaur, ça que la sa lenga es pro influençada per la dels felibres rodanencs (per exemple, escriu *o* la vocala eissida de A latin post tonic, alara que dins Champsaur se pronuncia [a]).

Es probable tanben que Silvan Tolza (Toulze) e Zefir Bòsc amb respectivament 24 % e 32 % de *mai* s'aluenhan de l'usatge vernacular de lor parlar, ça que la aquò demandariá d'esser verificat.

A cò dels felibres rodanencs, lo percentatge de *mai* es comprès entre 17 % (Mistral e Romanilha) e 45 % (Aubanel). Ça que la, i a una excepcion : lo canonge Emanuèl Bernard, originari de Piolenc en riba de Ròse, al nòrd de Vauclusa – e qu'escriu pr'aquò dins un provençal mistralenc perfíechament ortodòxe – emplega pas jamai *mai*. Amb aquò, es cò meteis dins las òbras de Joan-Baptista Còia (Coye), autor arlatenc del siècle XVIII. Aquò gita un doble sul caractèr “natural” de l'emplec de *mai* a cò dels felibres rodanencs.

Globalament, podèm concluir que en defòra del domeni gascon, l'emplec de *mai* per la gradacion dels adjectius e del advèrbis es pas jamai estat majoritari dins cap de varietat d'occitan.

#### 4.4. Emplec de *mai* per la quantificacion dels substantius

Las donadas del còrpus confirmen que *p(l)us*, a la diferéncia de l'occitan medieval, s'emplega pas en occitan moderne per la quantificacion dels substantius<sup>14</sup>. Las excepcions rarissimas qu'avèm trobadas se rescontran, per la màger part, dins d'autors anteriors al siècle XIX. Globalament, per 1378 occurréncias de *mai*, avèm trobadas 14 occurréncias de *p(l)us*, siá 0,1 %, dont 9 dins de tèxtes anteriors al siècle XIX. Las cinc que demòran se pòdon probablament explicar per l'influéncia del francés.

L'abandon de *p(l)us* se pòt explicar pel fach que, en occitan medieval, *plus*, aital coma *mai*, èra un adverbi positiu que podia, o pas, se trobar dins la portada de la negacion. A partir del moment que *plus* a aquesit, en contexte verbal, un sens negatiu, siá sol, siá en correlacion amb *pas* dins l'encastre d'un sistèma de concordéncia negativa (segon las varietats), alara que *mai* a servat un sens positiu, *p(l)us* es sortit de l'usatge per la quantificacion dels substantius.

### 5. Perspectivas de recèrca

A partir del còrpus e de ses extensions futuras, mai d'un desenvolopament son envisatjats :

- extension de l'estudi dels contexes particulars a l'ensemble del còrpus.
- estudi de las negacions (*pas*) *p(l)us* (fr. *ne...plus*) e *pas mai* (fr. *ne...plus* o *pas davantage*).
- evolucion diacronica dels diferents sistèmas (gradacion, quantificacion, negacion)
- alargament de l'estudi de las locucions *mai o mens* e *de mai en mai / de pus en pus*.
- emplec de *mai* en contexte verbal.
- estudi de las estructuras de tipe *res pus*, *res mai*, *degun pus*, *degun mai*, *cap pus* eca.
- comparason amb d'autors contemporanèus de las generacions d'aprèp la Segonda Guerra mondiala.

Tre ara lo còrpus es en partida indexat en foncion d'aqueles objectius.

<sup>14</sup> A part benlèu dins de rars parlars marginals. Ne coneissèm un exemple : lo parlar de Chaumont (Chiomonte) dins la nauta valada de Susa en Itàlia que s'i tròba de condicions particularas : *mai* [me] i a pres lo sens de *tanben* ; l'equivalent de la negacion (*pas*) *plus* es : *pòrre* (< *pas aure* < PASSU + ALID REM). Dins las autres comunas de la valada, *pus* en amont, s'utiliza *mai* (Chaumont es lo darríer vilatge occitanofòn al còp al nòrd e a l'est, a 3 km se parla francoprovençal e Susa, a 7 km, es una enclava piemontesa).

## Referéncias bibliograficas

### Estudis

- ALF = Gilliéron, Jules & Edmont, Edmond (1902-1910). *Atlas linguistique de la France*, Paris, Honoré Champion.
- ALIBÈRT, Loís (1976). *Gramatica occitana segon los parllars lengadocians*, Montpelhièr, CEO.
- SALVAT, Joseph (1998). *Gramatica Occitana*, Tolosa, Collègi d'Occitania (5<sup>a</sup> edicion).
- SIBILLE, Jean (2015). *Description de l'occitan parlé à Sénaillac-Lauzès et dans les communes voisines*, Limoges, Lambert Lucas.
- VERNET, Florian (2000). *Dictionnaire grammatical de l'occitan moderne (selon les parlers languedociens)*, Montpellier, CEO.

### Sorsas primàries

La longor d'aqueste article estent limitada, nos es pas possible de donar las referéncias de la totalitat de las òbras contengudas dins lo còrpus. Donam pas que las referéncias de las que son mencionadas dins lo còs de l'article.

- BENAZET, Augusto (1933). *Taritatous*, Rodés, Salingardes.
- BESSON (= Bessou), Justin (1995). *Dal brès a la tomba*, ed. Joan de Cantalausa et al., Lo Monastèri, Ed. Cultura d'òc (transcripcion en grafia classica).
- BESSON (= Bessou), Justin (1994). *Contes de la Tata Mamon*, ed. Joan de Cantalausa et al., Lo Monastèri, Ed. Cultura d'òc (transcripcion en grafia classica).
- BODON (= Boudou), Joan (1975). *Sus la mar de las galères*, Tolosa, IEO
- BODON (= Boudou), Joan (1978). *Lo Libre de Catòia*, Tolosa, IEO.
- BODON (= Boudou), Joan (1988). *L'Evangeli de Bertomieu*, Tolosa, IEO.
- BODON (= Boudou), Joan (1989). *La Quimèra*, Tolosa / Rodés, IEO / Edicions de Roergue.
- BODON (= Boudou), Joan (1990). *La Santa Estèla de Centenari*, IEO / Ed. de Roergue.
- BODON (= Boudou), Joan (1996). *Lo Libre dels grands jorns*, IEO / Ed. de Roergue.
- BODON (= Boudou), Joan (2003). *Lo Pan de froment*, IEO / Ed. de Roergue.
- BODON (= Boudou), Joan (2003). *Contes dels Balssàs*, IEO / Ed. de Roergue.
- BODON (= Boudou), Joan (2003). *La Grava sul camin*, IEO.
- BODON (= Boudou), Joan (2003). *Contes del Drac*, IEO / Ed. de Roergue.
- BODON (= Boudou), Joan (2003). *Contes del mieu ostal*, IEO / Ed. de Roergue.
- BODON (= Boudou), Joan (2003). *Contes de Viaur*, IEO / Ed. de Roergue.
- DELÈRIS, Ferran (2000). *Los crocants de Roergue*, IEO.
- DELÈRIS, Ferran (2002). *Memòris*, IEO.
- FÉRAUD, Raymond (1874), *La vida de sant Honorat*, ed. A.-L. Sardou, Nice, Imprimerie Caisson et Mignon.
- FOURÉS, Augusto (1875). *La croès de l'inoundaciu*, Castelnòu d'Arri, Faustin Chavard.
- FOURÉS, Augusto (1888). *Les grilhs*, Paris, Maisonneuve et Leclerc.
- FOURÉS, Augusto (1891). *Les cants del soulelh*, Carcassonne, G. Servière.
- FOURÉS, Augusto (1896). *La Muso Silvestro*, Carcassonne, Bibliothèque de la Revue Méridionale.
- FOURÉS, Augusto (1912). *La Sègo*, Carcassonne, Bibliothèque de la Revue Méridionale.
- Grammaires provençales de Hugues Faidit e Raymond Vidal de Besaudun* (1868), ed. F. Guessard, 2<sup>ème</sup> édition, Paris, A. Franck.
- Las Flors del gay saber o las leys d'amor* (1841), eds Aguilard / Gatien-Arnout, Toulouse, J.-B. Paya.
- La Vie de sainte Douceline fondatrice des bégumes de Marseille, composée au treizième siècle en langue provençale* (1879), ed. Abbé J.-H. Albanés, Marseille, Étienne Camoin.
- Le livre Potentia des États de Provence : 1391-1253* (1997), ed. Gérard Gouiran / Michel Hébert, Paris, CTHS.
- LERCHER, Alain (2003), traductor Ives Roqueta (= Rouquette), *Las trèvas d'Orador*, IEO.
- Le roman de Notre Dame de Lagrasse*, ed. Émile Simonnet, edición electronica : <<http://emile.simonnet.free.fr/sitfen/tabsom.htm>>

*Les biographies des troubadours en langue provençale* (1885), ed. Camille Chabaneau, Tolosa, Privat.


MARTÍ, Robert (2006). *Lo balestrièr de Miramont*, IEO.

MOULY, Enric (1979). *E la barta floriquèt*, IEO.

*Nouveau Testament de Lyon* (2012), eds. Peter Ricketts & Roy Harris, edicion electronica (versió comunicada pels editors científics).

Apêndice

## I. Mapa ALF 1282 *plus tard*



**II.** Resultats del comptatge de les ocurréncies de *pus* e *mai* per la gradacion dels adjectius e dels advèrbis.

LENGADOCIAN				
Autor e sègle	Localizacion	Nombre de mots	<i>p(l)us + Adj/Adv</i>	<i>mai + Adj/Adv</i>
P. Goudouli XVI-XVII ●	<i>Tolosa</i>	41 500	104	0
J.-B. Fabre XVIII	<i>Gard</i>	10 700	42	0
La Fare Alais XVIII	<i>Cevenas</i>	11 900	30	0
J. Bessou XIX	<i>Oèst-Avairon</i>	45 600	203	0
J. Glas XIX	<i>Cevenas</i>	12 300	29	0
A. Vermenouze XIX	<i>Sud-Cantal</i>	18 400	53	0
L. Pujol XX	<i>Arièja</i>	86 400	315	0
J. Boudou XX ●	<i>Oèst-Avairon</i>	375 200	581	3 (0,5 %)
A. Bénazet XX	<i>Oèst-Avairon</i>	27 000	29	1 (3 %)
J. Castagno XX	<i>Cevenas</i>	57 800	97	1 (1 %)
Cantalausa XX	<i>Sud-Èst-Avairon</i>	61 800	125	4 (3 %)
F. Deléris XX	<i>Oèst-Avairon</i>	185 200	251	1 (0,4 %)
H. Mouly XX	<i>Oèst-Avairon</i>	86 400	212	1 (0,5 %)
F. de Cortètes XVII ○	<i>Agenés</i>	72 000	94	6 (6%)
P. Miremont XX	<i>Peiregòrd</i>	35 000	26	3 (10 %)
A. Fourès XIX □	<i>Aude</i>	84 800	50	41 (45 %)
A. Langlade XIX	<i>Lansargas (Montpelhièr)</i>	37 600	54	12 (18 %)
Jasmin XIX	<i>Agenés</i>	30 800	34	25 (42 %)
J.-A. Recluz XIX	<i>Besièrs</i>	10 500	31	19 (38 %)
L. Rouquier XIX-XX	<i>Puègserguièr (Besièrs)</i>	22 800	51	19 (27 %)
P. Albarel XX	<i>Narbona</i>	11 000	12 40	5 4 (29 %)
P. Azema XX	<i>Montpelhièr</i>	42 600	100	32 (24 %)
Z. Bosc XX	<i>Nòrd-Avairon</i>	90 800	110	51 (32 %)
Y. Rouquette XX	<i>Seta – Sud-Avairon</i>	18 700	29	12 (29 %)
L. Ruffié XX	<i>La Crotz Falgarda (31)</i>	78 700	160	31 (16 %)
J. Salvat XX	<i>Aude</i>	67 200	82	41 (33 %)
S. Toulze XX	<i>Òlt</i>	18 000	29	9 (24 %)
R. Martí XX □	<i>Tarn – Avairon</i>	30 900	19	34 (64 %)
M. Rouquette XX	<i>Argeliers (Montpelhièr)</i>	102 000	16	215 (93 %)

PROVENÇAL					
Autor e siècle	Localizacion	Nombre de mots	<i>p(l)us + Adj/Adv</i>	<i>mai + Adj/Adv</i>	
L. Belaud XVI ●	<i>Antibol</i>	14 500	31	0	
J.-B. Coye XVIII	<i>Arles</i>	26 000	54	0	
T. Gros XVIII	<i>Marselha</i>	20 700	73	0	
B. Artou XIX	<i>Tolon</i>	59 900	77	0	
E. Bernard XIX	<i>Nòrd-Vauclusa</i>	12 000	18	0	
L. d'Astros XIX	<i>Torvas (83)</i>	9 200	31	0	
C. Dauphin XIX	<i>Draguinhan</i>	12 400	17	0	
V. Gelu XIX	<i>Marselha</i>	37 300	133	0	
J. de Cabanes XVII ●	<i>Ais</i>	12 800	27	1 (4 %)	
G. Zerbin XVII	<i>Ais</i>	37 100	126	4 (3 %)	
J. Diouloufet XVIII-XIX	<i>Agulha (13)</i>	63 200	112	1 (0,9 %)	
M. Bibal, anthologie (*) XIX	<i>Marselha / Tolon</i>	92 700	163	3 (2 %)	
A. Bigot XIX	<i>Nimes</i>	62 000	106	1 (1 %)	
F. Chailan XIX	<i>Marselha</i>	22 200	46	1 (2 %)	
T. Aubanel XIX □	<i>Avinhon</i>	34 400	22	18 (45 %)	
F. Gras XIX	<i>Malamòrt dau C. (84)</i>	37 700	34	11 (24 %)	
F. Mistral XIX	<i>Malhana (13)</i>	111 775	100	20 (17 %)	
C. Rieu XIX	<i>Lei Bauç de Provença</i>	15 500	18	4 (18 %)	
J. Roumanille XIX	<i>Sant Romieu de Pr.</i>	40 000	35	7 (17 %)	

(\*) *Obro deis Encian, un Eissame de Pouësio Prouvençalo, reculido e assemblado pèr Bibal Marius, decan dei Troubaire Marsihés. Doun à l'Escola de la Nerto, en souveni de soun Sieisen Anniversari, lou 7 d'Outobre 1932,<http://www.cieldoc.com/libre/integral/libr0694.pdf>* (n'avèm retirats los quelques poèmes de T. Aubanel que i figuren, totes los autres poètas d'aquela antologia son originaris dels environs de Marselha o de Tolon e escriván dins la varietat locala).

LEMOSIN					
Autor e siècle	Localizacion	Nombre de mots	<i>p(l)us + Adj/Adv</i>	<i>mai + Adj/Adv</i>	
J. Foucaud XVIII ●	<i>Lemòtges</i>	47 100	70	0	
F. Richard XVIII	<i>Lemòtges</i>	9 400	30	0	
A. Chastanet XIX ●	<i>Moissidan (24)</i>	11 000	15	1 (7 %)	
J. Roux XIX	<i>Tula</i>	26 600	28	4 (12 %)	
R. Benoit XIX-XX	<i>Moissidan (24)</i>	8 700	23	2 (8 %)	

VIVARO-ALPENC					
Autor e siècle	Localizacion	Nombre de mots	p(l)us + Adj/Adv	mai + Adj/Adv	
B. Abert XIX ●	<i>Chantamerle</i> (26)	41 900	102	0	
A. Boissier XIX	<i>Diá</i>	11 800	24	0	
Borel de R. XIX	<i>Gap</i>	31 600	44	0	
R. Grivel XIX	<i>Crest</i> (26)	40 000	110	0	
Queyras div. (*) XIX-XX	<i>Cairàs</i>	7 000	15	0	
D. Meyer XX ○	<i>Champsaur</i>	30 700	32	2 (6 %)	

(\*) Poèmas e tèxtes courts de diverses autors + 1 etnotèxte.

AUVERNHÀS					
Autor e siècle	Localizacion	Nombre de mots	p(l)us + Adj/Adv	mai + Adj/Adv	
Ch.-A. Ravel XIX ●	<i>Clarmont</i>	9 900	23	0	
R. Michalias XIX-XX □	<i>Liuradés</i>	20 000	19	7 (27 %)	
H. Gilbert XX ■	<i>Brivadés</i>	13 900	5	9 (64 %)	

GASCON					
Autor e siècle	Localizacion	Nombre de mots	p(l)us + Adj/Adv	mai + Adj/Adv	
Despourrins & al. XVIII (*) □	<i>Biarn</i>	36 600	46	40 (47 %)	
G. Ader XVII ■	<i>Gimont</i> (32)	26 313	2	66 (97%)	
M. de Camelat XX	<i>Arrens</i> (65)	68 712	1	96 (99 %)	
G. Bédout XVII ■	<i>Aush</i>	20 800	0	31 (100 %)	
H. Dambielle XIX	<i>Samatan</i> (32)	9 500	0	15 (100 %)	
J. Casebonne XX	<i>Biarn</i>	25 300	0	68 (100 %)	
Ph. de Gerde XX	<i>Gerda</i> (65)	28 000	0	51 (100 %)	

(\*) Poésies béarnaises, E. Vignancour ed., Pau, 2a edición, 1852.